

## JANUAR 2017., NOVA PRAVILA U FINANSIJSKOM POSLOVANJU

**Dana 30. decembra 2016. godine je počela primjena Zakona o finansijskom poslovanju FBiH (Zakon), sa primarnim ciljevima zaštite i poboljšanja položaja malih i srednjih preduzeća koji se pojavljuju kao povjerioci u platnim transakcijama.**

Zakon uređuje pravila finansijskog poslovanja, obaveze uprave i nadzornog odbora u vođenju poslova poduzetnika, poduzimanje mjera na osiguranju likvidnosti, rokove izvršenja novčanih obaveza između poduzetnika međusobno kao i poduzetnika i subjekata javnog prava, posljedice kašnjenja u izvršavanju novčanih obaveza, ništavost pojedinih odredbi ugovora o poslovnim transakcijama, te obaveze poduzetnika kod nastanka nelikvidnosti. U smislu Zakona, poduzetnikom se smatra pravno lice osnovano u skladu sa Zakonom o privrednim društvima FBiH, kao i fizičko lice koje samostalno obavlja privrednu djelatnost u skladu sa Zakonom o obrtu i srodnim djelatnostima FBiH.

Zakon se ne primjenjuje na potrošačke ugovore, niti na finansijske institucije, banke, društva za upravljanje investicijskim fondovima, društva za upravljanje penzijskim fondovima, društva za osiguranje i reosiguranje, lizing društva i mikrokreditne organizacije.

Iz Zakona izdvajamo slijedeće:

### ROKOVI ISPUNJENJA NOVČANIH OBAVEZA

Ugovoreni rok za ispunjenje novčane obaveze ne može biti duži od 60 dana, osim u slučaju da je dužnik novčane obaveze izdao povjeriocu sredstvo osiguranja koje ima snagu izvršne isprave, ali ni u tom slučaju rok ne može biti duži od 360 dana. Sredstvima osiguranja smatraju se: bankarska garancija koja sadrži klauzule "neopoziva", "bezuovjetna", "naplativa na prvi poziv bez prigovora", kao i avalirane mjenice kod banke. Svaka odredba kojom bi se rok dospijeća uredio suprotno navedenom se smatra ništavom. U slučaju da rok za plaćanje nije ugovoren, novčana obaveza mora biti izvršena u roku od 30 dana, bez ikakvog posebnog poziva povjerioca.

### OBAVEZE PODUZETNIKA KOD NASTANKA NELIKVIDNOSTI

Nelikvidnost nastupa u slučaju da: (i) poduzetnik kasni više od 60 dana u izvršenju jedne ili više kratkoročnih obaveza, a koji iznos prelazi 20% iznosa njegovih kratkoročnih obaveza objavljenih u zadnjem godišnjem finansijskom izvještaju; ili (ii) poduzetnik kasni više od 30 dana sa isplatom plaća, te pripadajućih poreza i doprinosa.

Zakonom je zabranjeno vršenje bilo kakvih plaćanja poduzetniku koji je nelikvidan, osim onih koja su nužna za redovno poslovanje, kao i poduzimanje radnji koje bi za posledicu imale oštećenje ili dovođenje povjerilaca u neravnotežan položaj.

## NEADEKVATNOST KAPITALA

Neadekvatnost kapitala kod društva postoji ako mu je na dan sastavljanja finansijskog izvještaja gubitak iz tekuće godine, zajedno sa prenesenim gubicima dostigao polovinu visine njegovog osnovnog kapitala. U navedenom slučaju, uprava društva je dužna preduzeti posebne mjere, i to: (i) analizira uzroke nastanka neadekvatnosti kapitala i predloži mjere za ostvarenje adekvatnosti kapitala nadzornom odboru; (ii) provodi mjere iz svoje nadležnosti i za koje je dobila saglasnost; te (iii) sazove skupštinu društva i predloži mjere iz svoje nadležnosti.

## PRIMJENA ZAKONA

Zakon se primjenjuje na ugovore koji su zaključeni nakon početka primjene ovog zakona, te na one poslovne transakcije koje su zaključene prije 30. juna 2016. godine, ali čija realizacija nije započela do 30. decembra 2016. godine. Stoga, ukoliko su u takvim ugovorima ugovoreni rokovi koji su duži od onih predviđenih zakonom za ispunjenje novčanih obaveza, takve odredbe će se nužno morati uskladiti sa Zakonom.

## NADZOR

Nadzor nad primjenom Zakona će vršiti Porezna uprava FBiH i Federalno ministarstvo finansija putem budžetske inspekcije, u okviru svojih nadležnosti.

## O WOLF THEISS-u

Wolf Theiss je jedna od vodećih konsultantskih firmi u Srednjoj, Istočnoj i Jugoistočnoj Evropi. Izgradili smo reputaciju kombinirajući poznavanje lokalnih prilika i snažnu sposobnost poslovanja na međunarodnom nivou. Otvorili smo prvi ured u Beču prije gotovo 60 godina. Naš tim danas okuplja preko 340 pravnika koji imaju raznoliko iskustvo i koji rade u 13 ureda na području Srednje, Istočne i Jugoistočne Evrope.

Ukoliko imate pitanja za nas, ne oklijevajte kontaktirati naše stručnjake:



**Samra Hadžović**

Advokat u saradnji sa Wolf Theiss-om

[samra.hadzovic@wolftheiss.com](mailto:samra.hadzovic@wolftheiss.com)

T: +387 33 953 457



**Ilma Kasumagić**

Stručni saradnik

[ilma.kasumagic@wolftheiss.com](mailto:ilma.kasumagic@wolftheiss.com)

T: +387 33 953 458

Ovaj memorandum pripremljen je u svrhu pružanja opće informacije te ne predstavlja pravni savjet.

Slijedom toga, WOLF THEISS ne prihvaća nikakvu odgovornost za bilo čije djelovanje ili propuštanje, na bilo koji način, a koje je utemeljeno na informacijama sadržanim u ovom memorandumu.

Ako želite saznati više o temi ovog memorandum ili općenito o našim uslugama, molimo Vas da se obratite na gore navedene kontakte ili na:

Wolf Theiss d.o.o. Sarajevo  
Zmaja od Bosne 7/III  
71000 Sarajevo  
Bosna i Hercegovina  
Tel.: +387 33 953 444  
Fax: +387 33 953 445  
[www.wolftheiss.com](http://www.wolftheiss.com)